

प्रादेशिक समाचार

- केन्द्रीय गृहमंत्री अमित शाह कोटपूतली-बहरोड़ रा पावटा मांय सनातन धर्म सम्मेलन ने संबोधित कर्या-कह्या संतां रो जनकल्याण अर पर्यावरण संरक्षण मांय अहम योगदान।
- केन्द्रीय कानून मंत्री अर्जुनराम मेघवाल कह्या-देशभर री न्यारी-न्यारी अदालतां मांय लम्बित मामलां रा निपटारां खातर ए.डी.आर. मैकेनिज्म तैयार कर्यो जा रह्यो है।
- भारतीय जनता पार्टी आज आप रो 46वो थापना दिवस मना री है-प्रदेशभर मांय केई कार्यक्रम राख्या गया।
- देशभर मांय रामनवमी रो पर्व परम्परागत उच्छाव रे सागे मनायो जा रह्यो है।

000

केन्द्रीय गृह मंत्री अमित शाह आज कोटपूतली-बहरोड़ जिला रा पावटा मांय धार्मिक समारोह मांय शामिल व्ह्या। वणा बावड़ी रा बाबा बालनाथ री तप री ठौड़ माथे राख्या 108 कुंडीय रुद्र महामृत्युंजय महायज्ञ री पूर्णाहुति मांय भाग लीना। श्री शाह सनातन धर्म सम्मेलन ने भी सम्बोधित कर्या। वे कह्या के बाबा बालनाथ जनकल्याण, पशु-पक्षियां री सेवा, पर्यावरण संरक्षण अर सामाजिक समरसता खातर काम कर्यो, जिण ने वां रा अनुयायी लगातार आगे बढ़ा रिया है।

केन्द्रीय मंत्री कह्या के नाथ संप्रदाय सनातन धर्म ने मजबूत करबा रो काम कर्यो है। परंपरा अर आध्यात्म सूं जुड़्या इण धार्मिक आयोजन मांय राजस्थान समेत न्यारा-न्यारा राज्यां सूं बडी संख्या मांय सिरधालू शामिल व्ह्या। मुख्यमंत्री भजनलाल शर्मा समारोह ने सम्बोधित करता थकां कह्या के सरकार धार्मिक ठौड़ां रा विकास खातर राज्य बजट मांय केई ऐलान करी है।

केन्द्रीय मंत्री भूपेंद्र यादव, जयपुर ग्रामीण सांसद राव राजेंद्र अर केई विधायक इण कार्यक्रम मांय मौजूद रह्या।

000

प्रधानमंत्री नरेन्द्र मोदी कह्या के लारला दस बरस मांय सरकार देश मांय बुनियादी ढांचां ने मजबूत करबा रो काम कर्यो है। बणा आज तमिलनाडू मांय वर्टिकल लिफ्ट समुद्री सेतु रो उद्घाटन कर्या अर आठ हजार तीन सौ करोड़ रिप्यां री परियोजनावा री नीव राखी।

श्री मोदी रामेश्वरम तांबरम एक्सप्रेस ने भी हरी झंडी दिखा र रवाना कर्या। इण ब्रिज मांय एक स्वचालित इलेक्ट्रो मैकेनिकल लिफ्ट सिस्टम है, जो इण ने 17 मीटर ऊपर उठावा मांय इमदाद करेला, जिण सूं इण रे नीचे सूं जहाज आसानी सूं गुजर सकेला। पम्बन रेलपुल साढ़े पांच सौ करोड़ रिप्यां री लागत सूं तैयार कर्यो ग्यो है।

000

केंद्रीय कानून मंत्री अर्जुनराम मेघवाल कह्या के देशभर मांय न्यारी-न्यारी अदालतां मांय लम्बित मामला रो हल काडबा खातर ऑल्टरनेटिव डिस्प्यूट रेजोल्यूशन यानि एडीआर मैकेनिज्म बणायो जा रह्यो है। वे कह्या के इण रे जरिये अदालतां मांय करीब पांच करोड़ सूं बत्ता लम्बित मामलां रा निपटारा मांय इमदाद मिलेला। झुंझुनूं रा टमकोर मांय एक कार्यक्रम मांय भाग लेबा रे पाछे मीडिया सूं बातचीत मांय श्री मेघवाल कह्या के इण रा बेगी ही चोखा नतीजा सामे आवेला।

अदालतां मांय खाली ठौड़ा ने भरबा रा सवाल माथे श्री मेघवाल कह्या के इण खातर सरकार गंभीर है। इण रे पाछे केन्द्रीय मंत्री चूरू पूग्या जठे वणा जन सुणवाई करी।

000

प्रदेश मांय राष्ट्रीय राजमार्ग 21 माथे 9 फलाईओवर बणाया जावेला। इण मांय सूं 6 फलाईओवर दौसा जिला मांय अर 3 जयपुर जिला मांय बणेला। सड़क परिवहन अर राजमार्ग मंत्रालय इण री मंजूरी दे दी है। इण माथे करीब 286 करोड़ रुपये खर्च कर्या जावेला।

सड़क हादसां री रोकथाम खातर 9 ठौरा री पीछाण करी गयी है जठे ये फलाईओवर बणेला। इण सूं हाईवे ने जीरो एक्सीडेंट जोन बणावा री दिशा मांय इमदाद मिलेला। दौसा मांय बालाजी मोड़, मानपुरा चौराहा, जीरोता कट, दौसा बाईपास, कलक्ट्रेट अर पुलिस लाईन चौराहा माथे ये फलाई ओवर बणेला। वठिने जयपुर जिला मांय बांसखोह फाटक, बस्सी चक अर कानोता बस अड्डा माथे आने बणायो जावेला।

000

भारतीय जनता पार्टी आज आप रो 46वो थापना दिवस मना री है। प्रधानमंत्री नरेन्द्र मोदी अर भाजपा रा राष्ट्रीय अध्यक्ष जे.पी. नड्डा थापना दिवस रे मौके पार्टी कार्यकर्तावां ने बधाई दी। इण मौके श्री नड्डा कह्या के भाजपा सत्ता खातर आप री विचारधारां सूं समझौता नी कर्यो है। थापना दिवस रे मौके नई दिल्ली रा पार्टी मुख्यालय मांय कार्यकर्तावां ने संबोधित करता थकां वे कह्या के पार्टी री विचारधारा भारतीय परंपरा अर संस्कृति सूं जुड़ी व्ही है। श्री नड्डा जनसंघ अर भाजपा रा संस्थापक श्यामा प्रसाद मुखर्जी, पंडित दीन दयाल उपाध्याय, अटल बिहारी वाजपेयी, लाल कृष्ण आडवाणी अर जगन्नाथ राव जोशी ने याद कर्या। अठिने, जयपुर मांय थापना दिवस रो राज्य स्तरीय कार्यक्रम राख्यो गयो।

इण मौके प्रदेश भाजपा कार्यालय मांय मुख्यमंत्री भजनलाल शर्मा अर पार्टी प्रदेश अध्यक्ष मदन राठौड़ झंडा रोहण कर र विशेष प्रदर्शनी रो उद्घाटन कर्या। कार्यक्रम मांय केई मंत्री, विधायक अर बड़ी संख्या मांय पार्टी कार्यकर्ता शामिल व्हा। न्यारा-न्यारा जिला मांय भी थापना दिवस समारोह मनायो जा रह्यो है। थापना दिवस कार्यक्रमों री कड़ी 13 अप्रैल ताई चालेला।

000

रामनवमी रो तिवार आज परम्परागत सिरधा रे सागे मनायो जा रह्यो है। यो तिवार भगवान विष्णु रा सातवां अवतार भगवान राम रा अवतरण रो प्रतीक है। रामनवमी चैत्र माह री नवमी तिथि ने मनायी जावे है। इण मौके प्रदेशभर मांय मेळा, शोभायात्रा अर दूजा धार्मिक कार्यक्रम राख्या जा रह्या है। जयपुर मांय रामनवमी माथे पारम्परिक शोभायात्रा काडी जा री है। इण मांय रंग बिरंगी झांकियां अर लवाजमा शामिल है। केई

ठौड़ा माथे शोभायात्रा रो फूलां सूँ स्वागत कर्‍यो जा रह्यो है। इण रे पछे राज्यपाल हरिभाऊ बागडे अर मुख्यमंत्री भजनलाल शर्मा रो महाआरती मांय शामिल होबा रो कार्यक्रम है। जैसलमेर ज़िला रा रामकुंडा प्राचीन राम मिन्दर मांय मनभावनी सजावट करी गई है। हनुमानगढ़ रा भद्रकाली माता मिन्दर मांय खास पूजा करी जा री है। अठे बडी संख्या मांय सिरधालू दर्शन खातर पूग रह्या है। सवाईमाधोपुर रा चौथ का बरवाड़ा रा चौथ माता मिन्दर मांय सिरधालूआं री भारी भीड उमड़ री है। ब्रज हलका भरतपुर मांय भी रामनवमी उच्छाव रे सागे मनायी जा री है। इण मौके डूंगरपुर मांय शोभायात्रा काडी गयी, जिण मांय 51 घोडा अर लवाजमा रे सागे बडी संख्या मांय थानीय लोग शामिल व्ह्या। नागौर मांय भगवान राम रा जन्मोत्सव री झांकियां री शोभायात्रा काडी गयी। इण मांय अंतरराष्ट्रीय ख्याति प्राप्त रेसलर द ग्रेट खली भी शामिल व्ह्या। पाली मांय सुंवारे प्रभातफेरी अर दोपहर मांय शहर रा खास रास्ता सूँ शोभायात्रा काडी गयी। शोभायात्रा मांय कुरीतियां री कानी जाग जगावती झांकियां लोगां ने रिझायी। झालावाड़, चूरू, करौली, बाड़मेर, डूंगरपुर, हनुमानगढ़ भीलवाडा अर जालौर मांय भी शोभायात्रा निकाली ज्यी।

000

प्रदेश मांय पांचवी कक्षा री बोर्ड परीक्षावां काल सूँ सरू व्हे री है। राजस्थान माध्यमिक शिक्षा बोर्ड री कानी सूँ ली जाबा वाळी ये परीक्षावां 17 अप्रैल ताई चालेला। बोर्ड रा सचिव कैलाश चन्द्र शर्मा बताया के इण परीक्षावां खातर 13 लाख 58 हजार पढनियां पंजीकृत है। इण वास्ते 19 हजार 578 परीक्षा केन्द्र बणाया गया है। वे बताया के पढनियां रा प्रवेश पत्र जारी कर दिया गया है।

000

प्रदेश मांय गर्मी जोर पकड़ती जा री है। मौसम महकमो बाड़मेर अर जैसलमेर ज़िला मांय बत्ती गर्मी रे चालता लू रो ऑरेंज अलर्ट जारी कर्‍यो है। वठिने 9 ज़िला मांय लू रे चालता येलो अलर्ट जारी कर्‍यो ग्यो है। ये हालात 9 अप्रैल ताई बण्या रह सके है। आवता दो दिनां मांय पश्चिमी बाळ रो असर बढ सके है। इण सूँ बाड़मेर जालौर अर जैसलमेर मांय कुछ एक ठौड़ां माथे तापमान 45 डिग्री सैल्सियस सूँ बत्तो व्हे सके है। इण दौरान जोधपुर अर कोटा संभाग मांय कठे-कठे तेज लू चालबा रा आसार है।

अठिने बाड़मेर मांय तापमान बढवा रो असर लोगो माथे पड रह्यो है।

000

आईपीएल क्रिकेट मांय आज सनराईजर्स हैदराबाद रो मुकाबला गुजरात टाइटन्स री टीम सूँ व्हेला। हैदराबाद मांय यो मैच सिंज्यां रे साढे सात बज्यां सूँ खेल्यो जावेला। इण मांय गुजरात तीन मैच मांय सूँ दो मैच जीत र अंक तालिका मांय तीसरी ठौड़ माथे है, जद के हैदराबाद चार मैच मांय एक जीत रे सागे सब ऊँ नीचे है।

000